

րեալ զնոսա ածին յերուսաղէմ . բայց ոչ կացին 'ի պայմանի ուխտի իւրեանց , եւ բռնացեալ խնդրէին զկանոնաւորս եւ զանկանոնս , եւ նոքա կային 'ի չքաւորութեան : Եւ Պօղոս եպիսկոպոս , որ էր յԱղէքսանդրեա , գրեաց յերուսաղէմ և հարցանէր զորպիսութենէ վանաց և զգալստենէ Բղեշխին : Իսկ սոքա հանին 'ի ճանապարհ ըզկիրակոս եպիսկոպոս (յ8 Մայիսի) գնալ 'ի Կոստանդինուպօլիս և պատմել զանցն Բղեշխին և զտառապանս իւրեանց յերեսաց այլազգեաց և պարտատեարց , որպէս եւ գրեալ էին յառաջադոյն . առաքեցին ընդ նմա և զցուցակ միաբանաց՝ տեսանել թէ զո ոք 'ի նոցանէ արժան իցէ պահել : Եւ եղև 'ի դադարիլ տոկոսեաց պարտուց , յարեան պարտատեարք 'ի վերայ վանաց , և միաբանք փախուցեալ թագչէին սենեակ 'ի սենեկէ , և 'ի պատահիլ Փոխանորդին կալեալ զնա գանիւք եւ խոշտանգանօք վարէին 'ի դատաստան , և 'ի ճանապարհի պատահեալ ոմանց 'ի բարեկամաց միջնորդ լեալ աղաչանօք թափէին զնա 'ի ձեռաց նոցա , իսկ ոմանք 'ի միաբանաց անզգաստ և անխորհուրդ՝ պեղէին զչարիս 'ի կորուստ անձանց իւրեանց , հրապուրելով զայլազգիս , թէ մի հաւատայք բանից Խորհրդականաց , զի նոքա միայն կարող են վճարել զտոկոսիս և պահել զվանս , և այլ այսպիսի անասելի բանք , զորս չէ արժան դրոշմել 'ի գիր , որոյ վասն արտաքսեալ 'ի վանաց առաքեցան 'ի Ռեմէ : Չհանդուրժեալ Խորհրդականաց՝ խորհեցան խոյս տալ յերուսաղէմէ և փակել առ ժամանակ մի զգուռն վանաց , որպէս պատրաստեալ զպաշար ճանապարհի առաքեցին 'ի Բեթղեհէմ . գնացին Կարապետ եպիսկոպոս և Յակոր վարդապետ , և մնային զալստեան այլոց , այլ հասեալ առ նոսա գիր Կարապետ Պատրիարքի՝ արգել զնոսա 'ի խորհրդոցն , թէպէտ և Պօղոս եպիսկոպոս յորդորեալ էր բազմիցս գրով տանել վշտաց և չթողուլ զԱթոռն , այլ սոքա արարին պատասխանի թէ՛ համբերեմք մի ամիս եւս , այնուհետեւ չէ հնար մնալ , զի լուեալ էին զսպառնալիս Բղեշխին Դամասկոսի . եթէ նորոգեսցի ասէր իշխանութիւն իմ , զփոխանորդն Լատինաց եւ զԿրօնաւորս Հայոց հանդերձիւք իւրեանց հանից 'ի փայտ 'ի դրուռն վանաց : Եւ 'ի սոյն աւուրս ոմանք 'ի պարտատեարց բռնութեամբ